



Broj: 06-11-8803/4-22 veza
Ilidža, 07.02.2023. godine

Na osnovu člana 100. stav (3) Zakona o javnim nabavkama ("Službeni glasnik BiH" broj: 39/14 i 59/22), rješavajući po žalbi privrednog subjekta PZU Agram poliklinika Sarajevo – u daljem tekstu Žalilac, izjavljenu na Odluku o dodjeli ugovora za javnu nabavku 147/22, broj: 06-11-8803-3/22 od 13.01.2023.g. u postupku javne nabavke " **Nabavka usluga sistematskog kontrolnog ljekarskog pregleda za uposlenike Općine Ilidža**", na preporuku Komisije za javne nabavke, općinski načelnik donosi:

ODLUKU

I

USVAJA SE žalba izjavljena od strane ponuđača PZU Agram poliklinika Sarajevo na Odluku o dodjeli ugovora za javnu nabavku 147/22 , broj: 06-11-8803-3/22 od 13.01.2023.g. u postupku javne nabavke „Nabavka usluga sistematskog kontrolnog ljekarskog pregleda za uposlenike Općine Ilidža“, kao djelimično osnovana.

II

Stavlja se van snage Odluka o dodjeli ugovora za javnu nabavku 147/22 , broj: 06-11-8803-3/22 od 13.01.2023.g. JU Zavod za medicinu rada Kantona Sarajevo.

III

Ugovor o javnoj nabavci za "Nabavku usluga sistematskog kontrolnog ljekarskog pregleda za uposlenike Općine Ilidža " **dodjeljuje se drugorangiranom ponuđaču PZU Agram poliklinika Sarajevo**, čija cijena ponude iznosi 59.985,00 KM.

IV

Izabrani ponuđač iz tačke III ove odluke je dostavio uz ponudu uvjerenja iz člana 45. stav 2 tačka a), b), c) i d) Zakona o javnim nabavkama.

V

Ova odluka objavit će se na web stranici Općine i istovremeno će se dostaviti ponuđačima koji su učestvovali u postupku predmetne nabavke.

Obrazloženje

Ugovorni organ je odlukom broj: 06-11-8803-1/22 od 12.12.2022.g. godine pokrenuo otvoreni postupak javne nabavke i to "Nabavka usluga sistematskog kontrolnog ljekarskog pregleda za uposlenike Općine Ilidža."

Broj obavještenja sa Portala javnih nabavki: 888-1-2-318-3-245/22 od 20.12.2022.g.

Procijenjena vrijednost nabavke iznosi: 60.000,00 KM bez PDV-a.

Ugovorni organ je, dana 13.01.2023.g., na preporuku Komisije za javne nabavke donio Odluku broj 06-11-8803-3/22 o dodjeli ugovora za javnu nabavku 147/22 JU Zavod za medicinu rada Kantona Sarajevo.



Ponuđač PZU Agram poliklinika Sarajevo je, nakon uvida u ponudu izabranog ponuđača JU Zavod za medicinu rada Kantona Sarajevo izjavila žalbu broj: 2359532 na navedenu Odluku o dodjeli ugovora, koja je kod ovog organa zaprimljena 02.02.2023.g. i protokolirana pod brojem 06-11-8803/4-22 veza.

Postupajući po predmetnoj žalbi, u skladu sa članom 100. Zakona o javnim nabavkama ugovorni organ je utvrdio da je žalba balgovremena, dopuštena i izjavljena od ovlaštenog lica i lica koje im aktivnu legitimaciju.

Osporavajući zakonitost pobijane Odluke ugovornog organa, Žalilac u svom **prvom navodu** ističe da sve stranice ponude izabranog ponuđača nisu numerisane, navodeći, pri tome da je odredbama člana 58. stav (2) Zakona o javnim nabavkama propisano da: "*(2) Ponuda mora biti čvrsto uvezana i sve strane ponude numerisane.*" Komisija za javne nabavke je ponovnim uvidom u ponudu izabranog ponuđača utvrdila da je ponuđač JU Zavod za medicinu rada Kantona Sarajevo numerisao sve stranice ponude osim naslovne čime nije narušen kontinuitet numerisanja. Navedeni stav Komisije je u skladu sa članom 8. stav (7) Uputstva za pripremu modela tenderske dokumentacije i ponuda kojim je propisano " Izuzetno od stava (6) ovog člana, ponuda neće biti odbačena ukoliko su listovi ponude numerisani na način da je obezbjeđen kontinuitet numerisanja, te će se smatrati manjim odstupanjem koje ne mijenja, niti se bitno udaljava od karakteristika, uslova i drugih zahtjeva utvrđenih u obavještenju o nabavci i TD. Uzimajući u obzir sve navedeno, ugovorni organ cijeni **neosnovanim** prvi navod Žalioca

Žalilac u **drugom žalbenom navodu** ističe da *izabrani ponuđač nije pravilno popunio Obrazac za ponudu, odnosno u Obrascu za ponudu, Izjavi ponuđača, pod tačkom 3., cijenu ponude je upisao samo brojevima, a u skladu sa zahtjevima iz tenderske dokumentacije trebalo je cijenu upisati brojevima i slovima.*

U vezi sa ovim navodom Žalioca, Komisija za javne nabavke izvršila je ponovni uvid u ponudu izabranog ponuđača JU Zavod za medicinu rada Kantona Sarajevo i utvrdila da navedeni ponuđač ni u jednom dijelu ponude gdje zahtjevano upisivanje cijene (Obrazac za ponudu, Obrazac za cijenu ponude), nije upisao cijenu svoje ponude slovima kako je tačkom 3.5. tenderske dokumentacije propisano da "Cijena ponude se piše brojevima i slovima."

Također, članom 14. stav (2) Uputstva za pripremu modela tenderske dokumentacije i ponuda (Cijena ponude) je propisano da:

"(2) Cijena ponude piše se brojevima i slovima. U slučaju neslaganja iznosa upisanih brojevano i slovima, prednost se daje iznosu upisanom slovima."

U skladu sa navedenim i Uputstvom za pripremu modela TD i ponuda, Komisija za javne nabavke konstatuje da ponuđač JU Zavod za medicinu rada Kantona Sarajevo nije postupio u skladu sa članom 14. stav (2) Uputstva za pripremu modela tenderske dokumentacije i ponuda kao ni u skladu sa tačkom 3.5. tenderske dokumentacije kojom je propisano da "Cijena ponude se piše brojevima i slovima", a što nije u skladu sa članom 57. stav (1) Zakona o javnim nabavkama kojim je propisano da je ponuđač prilikom pripreme ponude dužan pridržavati se zahtjeva i uslova iz tenderske dokumentacije. Imajući u vidu sve naprijed navedeno, Ugovorni organ ovaj navod Žalioca cijeni **osnovanim** što ponudu JU Zavod za medicinu rada Kantona Sarajevo čini nepravilnom jer ne ispunjava zahtjeve iz tenderske dokumentacije i ista se odbacuje u skladu sa članom 68. stav (4) tačka i) Zakona o javnim nabavkama.



Žalilac u svom posljednjem navodu ističe "...da izabrani ponuđač nije dostavio dokaz da ima odobrenje za obavljanje djelatnosti ginekologije za usluge koje su zahtjevane Tenderskom dokumentacijom. Naime, uvidom u Rješenje o dozvoli za obavljanje djelatnosti Ministarstva zdravstva Kantona Sarajevo koje je dostavio izabrani ponuđač, žalitelj je utvrdio da u predmetu Rješenju nije navedena djelatnost ginekologije. Iz navedenog, nesporno je da izabrani ponuđač nije dostavio dokaze o sposobnosti za obavljanje profesionalne djelatnosti koja je predmetom javne nabavke."

U postupku ponovnog pregleda i ocjene ponude, Komisija je utvrdila da je tenderskom dokumentacijom postavljen uslov u pogledu sposobnosti ponuđača za obavljanje profesionalne djelatnosti odnosno da je tačkom 2.2.1. tenderske dokumentacije propisano:

" 2.2.1 Što se tiče sposobnosti za obavljanje profesionalne djelatnosti u skladu sa članom 46. Zakona, kandidat/ponuđač mora biti registrovan u odgovarajućim profesionalnim ili drugim registrima zemlje u kojoj su registrovani, ili dostaviti posebnu izjavu ili potvrdu nadležnog organa kojom se dokazuje njihovo pravo da obavljaju profesionalnu djelatnost koja je u vezi sa predmetom nabavke."

dok je tačkom 2.2.2. tenderske dokumentacije propisano:

"Kao dokaz za ispunjavanje uslova iz tačke 2.2.1. kandidat/ponuđač treba dostaviti:

Rješenje o upisu u sudski registar ili Aktuelni Izvod iz sudskog registra ili neki drugi dokument kojim ponuđač nedvosmisleno dokazuje da je registriran za obavljanje predmetne djelatnosti."

Na osnovu navedenog, Komisija konstatuje da je izabrani ponuđač dostavljenim Aktuelnim izvodom iz sudskog registra ispunio uslov iz tačke 2.2.1 tenderske dokumentacije koji se odnosi na sposobnost obavljanja profesionalne djelatnosti odnosno dokazao da je registrovan za obavljanje djelatnosti koja je predmet nabavke.

Imajući u vidu navedene činjenice vezane za razmatrani navod Žalioca, isti se **smatra neosnovanim**.

U skladu sa iznesenim navodima uvažena je žalba Žalioca PZU Agram poliklinika Sarajevo u dijelu koji se odnosi na neupisivanje cijene ponude slovima od strane izabranog ponuđača te je utvrđeno da se **ponuda ponuđača JU** Zavod za medicinu rada Kantona Sarajevo treba odbaciti u skladu sa članom 68. stav (4) tačka i) Zakona o javnim nabavkama.

U žalbenom postupku je utvrđeno da je jedna ponuda, i to **ponuda ponuđača PZU Agram poliklinika Sarajevo prihvatljiva**, zbog čega se, prema članu 3. stav (3) Pravilnika o uslovima i načinu korištenja e-aukcije ("Službeni glasnik BiH", broj 66/16) ne može zakazati nova e-aukcija te se postupak okončava u skladu sa članom 69. Zakona o javnim nabavkama. U predmetnom postupku javne nabavke ugovor se dodjeljuje na vrijednost iz pisane ponude navedenog ponuđača koja iznosi 59.985,00 KM

Imajući u vidu sve naprijed navedeno, odlučeno je kao u dispozitivu ove Odluke.



Pouka o pravnom lijeku:

Protiv ove Odluke može se izjaviti žalba u roku od deset dana od dana prijema iste. Žalba se ulaže URŽ-u putem ugovornog organa u pisanoj formi direktno, ili preporučenom poštanskom pošiljkom.

Po ovlaštenju općinskog načelnika
broj 16-30-620/23 od 23.01.2023.g.

Lejla Abazović

DOSTAVLJENO:

1. PZU Agram poliklinika Sarajevo
ul. Trg međunarodnog prijateljstva 20, Sarajevo
2. Zavod za medicinu rada Kantona Sarajevo
ul. Bulevar Meše Selimovića 2, Sarajevo
- ③ 3. Stručna služba za zajedničke poslove (za objavu na WEB)
4. a/a

Izradila: Enisa O.M.

Kontrolisali: Nerma B.

Benjamin M.

